

四庫全書

史部

# 欽定四庫全書

史部

欽定勦捕臨清逆匪紀畧卷六  
四至

詳校官監察御史<sub>臣</sub>劉芬

編修<sub>臣</sub>裴謙覆勘

總校官進士<sub>臣</sub>朱鈴

校對官編修<sub>臣</sub>朱毓

謄錄監生<sub>臣</sub>李金翹

欽定四庫全書

欽定勦捕臨清逆匪紀略卷四

已巳

周元理奏言臣於十六日即親往德州與舒赫德面商訂定京兵齊抵東省時舒赫德即由德州從東路徑赴臨清其東昌一路官兵即由南路圍攻至臨清之西北即直隸沿河之故城清河一帶臣標保定官兵即日到齊臣即派委中軍副將瑪爾

清阿率領將備帶兵一千餘名臣亦親身前往由  
景州故城沿河一帶徑至臨清州之油坊直撲臨  
清與舒赫德會齊督同堵剿其餘各交界地方易  
於竄入之處俱派官兵截擒務期併力圍剿速殄  
么膺以靖地方奏入報

聞

同日周元理又奏言本月十七日戌刻據差弁探  
報臨清西北運河有賊匪搶奪回空糧船搭成浮

橋意圖北竄旋又准山東撫臣來咨臨清州稟報  
於州城西北隅望見賊人將糧船排撥外河似作  
浮橋之意查賊匪搭橋過河希圖竄逸甚關緊要  
現在正定鎮萬朝興已領兵前抵臨清臣即飛札  
該鎮帶兵五百名連夜前往該處督率弁兵將橋  
船盡行拆去竭力堵禦截殺以斷其北竄之路臣  
亦即帶臣標已到之兵星赴故城清河一帶策應  
如賊人尚未搭橋或橋船已拆賊仍回踞臨清臣

即駐劄該處俟京兵及各路兵到齊再行彼此關會三面合勦截擒奏入

諭曰又有旨令汝防守直隸接境之處亦屬要緊不必前往德州其橋口堵殺賊人即委之楊景素若兵力有餘商之舒赫德聽其調用

同日姚立德徐績奏言臣等探知賊人搶取民船桅木門扇搭作浮橋其開口搭橋之處即貼近賊匪屯劄之處現在賊衆甚多必須搗破賊巢始能

掣其橋木數日內官兵雲集即遵

旨會合勦殺將開口橋木及衛河所搭浮橋一併拆除  
以清運道至東昌府城東南北三面俱屬堅固高  
厚惟西南城墻垛口不全臣等於十日內已督府  
縣晝夜鳩工修竣其墻外地勢窪下西面並無居  
民地勢寬闊可以屯賊臣等慮在城兵單不敷防  
守十五日將東門外涵洞開放引運河之水灌注  
四面城壕現在東西南北四門水深三四五尺寬

四五丈至一二十丈不等使賊匪不易近城十六日已將涵洞堵閉運河之水不致涓滴消洩指日回空經行仍屬無礙現在臨清州城內官兵悉力固守臣徐績商定辦理之後適接舒赫德來札知京兵數日內即可到齊即於十六日率同鎮臣道府帶兵赴梁家淺迤北一帶屯劄俟舒赫德信到即進兵夾攻臣姚立德在東昌審案守城仍與徐績彼此聲息相通如有緩急隨時接應奏入報



聞

上命軍機大臣傳諭舒赫德拉旺多爾濟阿思哈周元理姚立德徐績曰昨舒赫德奏訊據王德供稱被擄時賊將其辮子解開挽上肱膀等語即此可為真賊之據舒赫德等臨陣殺賊時見有解辮挽結之人必當掩捕務獲誅戮無赦至所奏於二十四日各路會勘計京兵等正可如期到彼即阿思哈帶兵往迎徐績一路其程途諒亦不甚相遠自不至因此另改日

期再閱進到圖內舊城迤西之杏園莊現在亦有賊營近接邱縣館陶二縣即界連直隸之威縣平鄉此路並無堵剿之兵恐賊衆見東南北三面攻剿嚴緊自料勢難拒敵或避從西路潛竄不可不防舒赫德應再熟籌妥辦勿使釜底遊魂得以乘隙漏網至賊人敢於搭架浮橋冀圖竄逸尤為可惡昨已諭楊景素令其酌撥勇幹弁兵飛赴該處扼據船橋西口盡力堵殺今周元理聞有賊匪搭橋之信即派萬朝興

帶兵前往深合機宜其威縣平鄉一帶皆係直隸地方周元理尤當派撥弁兵嚴密巡防堵其外竄之路毋使一賊得以免脫

臣等謹按前奉

諭旨令楊景素帶兵扼據閘口已喪賊人之膽今復

命周元理選派將弁於西岸嚴密巡防絕其外軼之路卒之賊衆困守舊城聚而盡殲即有獷黠者乘夜潛泅偷渡皆為直省兵士所擊悉殫諸河其

直境平鄉威縣一帶接壤臨清閭閻寧謐無一村一堡或有雞犬之擾豈非先事豫防

神算無遺之明效歟

同日工科給事中李淑芳奏言竊查山東省壽張縣奸民聚衆滋擾一案臣於三四月間即聞進京人傳說各路上因雨澤稀少麥收歉薄行旅車馬動輒十數人圍繞不能行走所冀者秋收在邇可資接濟迨五六月後雖節次得雨總未透足歲既

不登而地方有司又復粉飾相沿收成分數捏報  
七分八分不等撫字無聞催科日蹙以致不法之  
徒乘機起釁雖曰奸民其實大半皆無告之饑民  
激而成之也方今

聖天子恩威並用簡派勁卒殲此小醜行見剋期掃除  
聿昭寧謐臣愚以為奸民之滋擾易制而饑民之  
流聚堪虞蓋饑民視奸民之指揮以為嘯應奸民  
恃饑民之附和以為聲援如此案以烏合之衆現

有兖州鎮及撫臣河臣三處官兵竟聽其號召蔓延一呼百諾夫無食流民所在多有飢寒之念迫則盜賊之心生臣聞目下近京西南一帶扶老攜幼遷徙逃亡地方官著人於盧溝攔住不令過橋北上道途傳言固未足據豈盡無因此等之人既乏生計輕去其鄉屬在老弱枵腹待斃情固可憫若係少壯救死不暇焉能盡保其奉公守法且直隸河南毗連東省萬一奸民輾轉煽誘饑民伺間

竊發文武員弁狃於以有事為無事化大事為小事之習視同泛常共相容隱道路村莊騷然不靖

密邇

畿輔腹心重地誠宜早圖伏見我

皇上覆載為心痛瘝時切偶遇偏災不惜數百萬金錢  
出水火而衽席之即勘不成災蠲緩者亦難以數  
計此固天下臣民所共聞知者也惟是料理於有  
事之後不若綢繆於無事之先臣請

勅下直隸河南山東督撫諸臣嚴飭各該州縣勿存迴  
護之見勿蹈諱匿之愆將所有被災貧民設法勞  
來分別安輯使之餬口有資不致流離失所再為  
之寬其徭役給其籽種俾得豫為來春之計斯顯  
以示其懷保之仁即隱以弭其不軌之志消兵於  
未兆泯患於未形億萬赤子胥躋仁壽之域矣臣  
一隅之見鯁鯁過計是否有當恭候

聖主訓示施行奏入



上命軍機大臣傳諭舒赫德周元理曰李漱芳所奏一  
摺實大不是奸民敢於聚衆叛逆劫庫殺官無論其  
並非饑民即饑民而敢於謀叛亦為國法所不宥乃  
李漱芳轉代之飾詞諉罪止圖為一己沽名而置順  
逆大義於不問是誠何心至所稱山東被災之說殊  
不足信今歲東省夏初雖有短雨之處入伏以後均  
以次霑足且係禹城平原德州一帶與壽張等縣無  
涉況賊匪所至需索村民米豆若果歉收各村莊何

從得有糧食以供賊搜掠又賊匪搶奪壽張陽穀堂  
邑三縣止劫庫銀不動倉穀若係饑民豈有見倉糧  
不取之理此皆足為非饑民激變之實據也至所稱  
西南近京一帶扶老攜幼遷徙逃亡地方官著人於  
盧溝橋攔住不令過橋北上等語亦屬荒唐河間天  
津所屬被有偏災之州縣周元理早經奏聞請撥通  
倉米十萬石以備賑借若地方官諱匿災傷又豈肯  
請發倉米其旨已頒發十日餘李淑芳必係見朕前

旨始為此奏至歉收地方男婦出外求食乃北省之  
常如直隸山東貧民赴口外種地覓食藉以滋生者  
甚多昨差福隆安進京挑兵時往來俱見有男婦相  
攜出口者問之知係河間百姓因該處歉收聞知口  
外年豐穀賤欲往什巴里台等處覓親就食方今中  
外一家間有貧民出口謀食乃自然裒益之道地方  
官非惟不必攔亦不必諱如果著人於盧溝橋攔住  
不令過橋又安得有北往之民為福隆安遇見者乎

著周元理查明該地方官是否果有此事即據實覆奏並飭有司毋許攔阻貧民出口即各州縣留養局原以贍無資餬口之人若係欲赴口外就親覓食者應各從其便不必強為勒留周元理亦即遵照妥辦李淑芳摺此時斷不可行并不可宣若宣發是轉眩惑愚民毆之從賊也將原摺封存事定後另辦將此諭令舒赫德知之

同日高晉奏言臣接奉

諭旨以賊首尚竄踞未獲恐東省追勦迫急賊黨逸入  
隣境蔓延為害

命臣將堵築漫工事宜交與薩載幫同吳嗣爵在工催  
辦即速馳赴山東連界之徐屬豐沛等處密調官  
兵督率防勦仰見

聖主睿慮周詳無微不至臣查漫工截至十三日已進  
埽三十個在工文武員弁咸知踴躍奮勉現在晝  
夜趕辦若似此天氣晴明料物人夫應手計期本

月二十六七日間即可合龍吳嗣爵於堵築漫工  
本所諳悉薩載在淮查辦災務近日災民業俱撫  
恤安插得所駐工幫同督辦甚為有益臣隨一面  
將堵築漫工事宜交明吳嗣爵薩載辦理一面遵  
旨即於就近徐屬之河漕兩標營內酌調兵一千二百  
名臣隨路帶往并於壽州鎮標備調兵五百名狼  
山鎮標備調兵三百名密飭豫為整備仍俟臣到  
徐後密探賊匪情形如需應用即飛調剋日起程

赴徐接應倘近境探有賊匪踪跡臣即帶兵前往  
追擒務期勦捕淨盡若東省業已平定逆案要犯  
全獲臣仍即回工堵築漫口不致顧此失彼奏入  
報

聞

庚午

上命軍機大臣傳諭舒赫德曰賊匪向各村莊需索米  
豆立時供給可見家有益藏並非儉歲昨日李漱芳

之奏實不足憑但徐績或有辦理不妥諱災匿報之事舒赫德一經訪查明確即據實密奏毋稍隱飾

臣等謹按逆匪釀亂由地方官緝捕邪教不密致賊人覺而先發實非飢寒驅迫而成即如首逆與餘黨多有田產入官而賊人所過村莊皆有益藏供其搜索則人非貧窶歲非荒歉可知乃李漱芳輒以饑民激變為詞賣陳

聖聰是直為亂民卸罪且幾眩惑愚民其何以懲奸靖



患乎我

皇上洞燭其沽名喜事之褊心與夫捕風捉影之陋習  
將原奏封存不加譴責仍

諭臣舒赫德密訪諸縣有無災傷撫臣有無諱飾以聞  
及臣舒赫德親莅體察知漱芳所言悉屬虛妄  
嗣復

欽差大臣會同府尹及該給事中親歷畿甸周巡數日  
並無一夫一婦如所奏遷徙逃亡者於是乎邪

喙始息仰見

聖主料事之得其正愛民之出於誠固非瞽見嚚語所能惑誣者也

同日舒赫德奏言臣查賊匪困守已閱旬餘萬一別生詭計轉難集事因於十七日飛札迎催京兵并令拉旺多爾濟阿思哈將前此在德州截留馬數百匹令兵丁更換趲行近又傳聞賊匪有欲離臨清之說臣念賊人現據臨清城外之大寺杏園

欽定勦捕臨清逆匪記略

二百名已到德州天津兵八百名現亦到有五百名業令於十七日即速起行臣即擬尾隨進發正在籌畫間適拉旺多爾濟阿思哈帶領頭起京兵於本日到來并知第二起亦於十九日可到臣定於明日即帶領現到各兵先行前進并隨時探聽賊信如無他竄之意即知照周元理徐績仍照原定三路進攻若賊人欲離臨清屬實臣同拉旺多爾濟阿思哈即迅帶現兵會同徐績惟一等隨後

尾追賊在倉皇窘迫之時正可乘機進殺兼之直  
豫兩省俱有官兵堵截亦可夾擊集事至第三起  
京兵續到德州時即令布政使國泰更換疲乏馬  
匹支領口食星速趕赴亦不致於遲誤

同日拉旺多爾濟阿思哈奏言臣等於本月十七  
日途次獻縣接准大學士舒赫德札稱德州現有  
馬匹可數更換即迅催京兵遄行以便剋期會剿  
臣等當即行知第二三起帶兵領隊各員加緊趕

行臣拉旺多爾濟阿思哈並先行遄發於十八日  
午刻已到德州臣等所領頭起官兵亦於本日晚  
間可到其第二起十九日可到第三起十九日晚  
間可到二十日必能齊集均可趕早一日至一路  
兵行俱甚安靜並遵

旨沿途酌量步行馬力尚皆可用謹此奏

聞奏入

上命軍機大臣傳諭舒赫德拉旺多爾濟阿思哈徐績

周元理何燭曰舒赫德等擬於十九日即率領現兵起程沿途偵探賊人消息酌量辦理所籌深合機宜至周元理何燭均當時刻留心探聽協力防堵以成犄角之勢至前此諭令阿思哈永昌帶領官兵間道迎遇徐績等合兵會勦之旨未知何日接到阿思哈等能否於進兵之前與徐績會合著舒赫德迅速具奏以慰廑念

同日姚立德徐績奏言臣等探得十五十六十七

等日賊匪並不攻城每日仍有數十人及百餘人  
在近城地方吶喊騷擾青州營叅將文壇帶領官  
兵并火繩鉛彈蠟燭等項於十七日進臨清州城  
協同防守臣等傳諭臨清城內官兵堅心固守無  
懈現准舒赫德密札知會定期二十四日會勦衛  
河雖搭浮橋今河西清河一帶已有直隸官兵堵  
截賊匪難以西奔臣等探聞各處莊民所言賊匪  
連日止於附近四鄉殷實之家索要糧草且青州



營叅將文壇得以帶兵入臨清州城是逆匪並無  
遠探其智短謀窮已可槩見又於九月十七日據  
館陶縣稟稱九月十五日在李官莊巡緝有賊匪  
四五十人明火執械飛馳而來大肆叫喊令助車  
輻口糧不從即放火殺害隨即督令文生趙之枚  
鄉民趙培元等二百餘人各執槍刀棍鋤上前圍  
敵砍死逆犯一十八人皆頭裹紅白布亦有腰纏  
紅白布者年俱二三十歲遺有槍刀桿棍等物餘

俱逃竄無踪等情除將該生等獎勵外謹此一併  
奏

聞奏入

上諭內閣曰趙之枚等深明大義保村殺賊甚屬可嘉  
趙之枚著加恩賞給教諭銜如再有出力之處另行  
奏聞錄用其鄉民趙培元等並令徐績即速查明賞  
給銀鍰以示獎勵至兩次趕殺賊匪之事俱係館陶  
縣士民而此次并係該縣督率該知縣自屬能事著

該撫即查明館陶縣知縣現係何人先將姓名奏聞  
仍於事竣後送部引見至該學文武生員俱能奮勉  
殺賊亦由該教職督課有方所有館陶縣教諭訓導  
並著該撫查明於事竣後咨部議叙東省雖有奸民  
煽播邪教糾衆逞逆之事而衿士細民尚能合力拒  
殲賊衆可見閭閻良善具有天良足為嘉慰著徐績  
等遍行曉諭以現今選派京兵前往勦賊自可即日  
掃除逆黨以靖地方倘賊勢窮蹙或有一二竄匿村

莊冀逃顯戮者斷不可輕宥百姓等如能出力擒殺賊匪赴該地方呈報驗明轉稟該撫具奏當量其殲獲賊犯多少輕重分別優加賞錄俾鄉曲士民益知觀感奮勉將此通行宣諭知之

上命軍機大臣傳諭舒赫德拉旺多爾濟阿思哈徐績周元理何燭曰昨閱舒赫德奏到進兵之圖覺西面安邱縣館陶一路不免空虛已諭令舒赫德妥協籌辦今賊人兩次至館陶村莊需索俱被村民打死可見

杏園莊一帶與館陶相近故賊人得以常出滋擾不  
可不留心堵截想舒赫德自必已妥為布置即直隸  
威縣平鄉地界周元理務宜留心防堵並派委勇幹  
將弁帶兵赴館陶等處勦禦勿使賊人得以竄逸至  
現在分路攻勦恐賊匪當窮蹙之際四散奔逃斷不  
可容其漏網而賊首尤為緊要周元理一路固不待  
言即何燭探知舒赫德到臨清之信亦當飭屬加緊  
追捕總期彼此合力妥辦迅速集事又賊人現佔臨

清舊城其地居民稠密今官兵各路會勦攻打時自難復別莠良但以除暴安民之事或至玉石俱焚朕心實有所不忍著舒赫德徐績等於進兵前再行宣諭舊城百姓以愚民為賊逼脅戀土難移尚可原恕今大兵雲集四面圍攻鎗礮所至立成齏粉殊屬可憫如該處百姓有能設計將賊擒獻者竟予免罪即或懦弱之人不能與賊相抗及早投出仍穿本身服色並不從賊記號者均准照脅從罔治若宣諭之後

仍然避匿不出即係甘心從賊雷轟電擊皆其自取  
即欲矜全亦無如之何矣如此曉諭之後再行進剿  
尤屬仁至義盡舒赫德等當妥為之又賊匪現在舊  
城堵截攻圍自難得脫即或一二人竄匿亦必躡迹  
追擒至其眷屬尤難逸出著舒赫德等勦平舊城賊  
衆後查點各賊眷口其係王倫親屬不分男婦大小  
盡行處斬其逆黨濟惡之眷口應行緣坐者亦即查  
明照例辦理

臣等謹按逆匪佔據臨清舊城居民被其逼脅  
戀土難移其情固為可原而其罪已難末減乃

蒙

聖心軫念顓愚曲加矜卹命臣舒赫德及徐績先期宣  
諭反覆開導俾投出者概予生全迷餉者始行  
誅戮此實法外

鴻慈仁之至而義之盡矣

同日舒赫德奏言本月十八日接奉



上諭昨選京兵一千皆係滿洲勁旅訓練有素自為得力如尚不敷用即著舒赫德據實奏明以便挑選發往欽此伏查么膺烏合本屬不成事體總以起事之初辦理未善兼以駐防綠營兵丁無用以致蔓延滋害今以臨清城內文武各員守禦堅固賊即無所施其伎倆不過迫脅搶擄為事暫爾偷生日見窮蹙轉慮其各處奔竄臣等現統率八旗勁旅一千及調集滿漢各兵軍威已極壯盛又徐績惟一

等所領官兵亦已不少並河西一帶周元理派兵截殺三面合攻定可一舉集事無庸再行添派京兵奏入

上諭內閣曰前因壽張奸民王倫傳習邪教糾衆滋擾罪大惡極不可及早勦滅以靖地方因山東綠營兵殊不足特特派滿洲勁旅千人前往剋期殄賊安良復念兵多則成事愈速因諭詢舒赫德酌量情形如尚需添派京兵即速奏請再派一千續往今據舒

赫德覆奏現今軍聲壯盛么膺烏合定可立即擒勦  
毋庸再添京兵等語所有直隸各站照例豫備車馬  
應付之處俱著即停撤以示體恤至事竣後京兵回  
程臨時均可緩站安行不必早為備辦也將此通諭  
知之

同日山東登州鎮總兵夏攀龍奏言臣於本月初  
九日已刻准撫臣徐績咨稱現在帶兵赴東昌府  
進勦逆賊恐賊人四散逃匿令臣酌派將弁抽調

馬步兵六百名親身率赴濰縣安邱縣一帶分佈  
嚴防臣正在調撥間復於本日亥刻准撫臣徐績  
咨因兵數尚不敷用調馬步兵六百名兼程速赴  
東昌府撥用並以省城無統兵大員令臣酌量帶  
兵親往防守臣隨即差檄調撥膠州營馬步兵二  
百名專委都司彭文林督領萊州營馬步兵二百  
名專委叅將馬文俊督領即墨營馬步兵二百名  
專委署叅將李進忠督領星夜兼程飛赴東昌府

聽候撫臣差捕并將濰縣安邱縣一帶派赴官兵  
檄委膠州營副將盧光裕統領分布督緝外臣隨  
挑撥標兵四百名并選派都守千把管領於初十  
日自登州起程親帶馳赴省城至賊匪情形臣因  
遠隔不能深悉未敢冒昧具陳奏入報

聞

同日何燭奏言河北鎮總兵黃模已於十五日過  
衛輝臣札令裹帶半月口糧即赴內黃邊界聽候

定地會勦臣親身帶領駐防滿兵四百名綠營標兵三百四十名率同署按察使周於智城守尉七十九等於九月十六日寅刻渡河前赴東省連界處所堵勦查滑縣濬縣封邱縣皆係豫省北路邊界與臨清相距不遠應行添派官兵於各縣要路堵禦臣前奏調南陽鎮兵一千四百名內派兵六百名分赴三縣防守其餘八百名飭令派官帶領前赴內黃縣接應再歸德府屬之考城商邱虞城

等縣緊接山東曹單二縣為賊人逃竄後路臣飭令南陽鎮許時中添派二百名親身帶往考城一帶督同歸德營官兵防守以為江南徐州府犄角並札令沿河渡口嚴行堵截務使一賊不得漏網以快人心奏入報

聞

同日徐績奏言臣現在勦殺逆匪雖不日殲除然安撫事宜尚需料理不能即回省城本年十月初

間例應考試武闈臣難以兼顧可否委令臬司孫  
廷槐代辦其外場監箭並委現在省城防守之登  
州鎮臣夏攀龍協同辦理謹請

旨遵行奏入

上諭內閣曰夏攀龍既在省城所有武闈外場自應就  
近委令監看至內場事務現在省城止有孫廷槐一  
人未便令其入場向來各省巡撫有奏令學政入武  
闈閱卷者此次山東武闈即著李中簡代辦內場事



務該部即遵諭行

欽定勦捕臨清逆匪紀略卷四

欽定四庫全書

欽定勦捕臨清逆匪紀略卷五

辛未

上諭內閣曰前任臨清州知州王溥現交吏部候旨議處自有應得處分今據呈聞有壽張奸民滋擾情願回東協同印官幫辦等語王溥准其前往山東交與大學士舒赫德令伊自備資斧聽候差遣事竣後視其如何出力再行奏聞請旨

同日楊景素奏言臣於十八日同末起官兵住宿  
任邱縣之新忠驛領兵侍衛音濟圖接准大學士  
舒赫德劄催當經臣與之商議將馬馱之物酌添  
飛車立即兼行趲程二十日已出直隸景州界本  
日可到德州又臣於十九日子刻在獻縣途次接  
奉軍機處傳單內開奉

旨挑派吉林索倫等精嫻弓箭兵丁五十名令

御前侍衛春寧帶往山東臣即星飛分傳上下各站遵

照豫備不致有誤奏入報

聞

同日周元理奏言臣於十八日欽奉

上諭臣於直境與臨清交界處所擇其最扼要者自行駐劄其餘則令總兵永昌萬朝興道員單功擢分駐防守臣查直隸與山東接界之處俱係平原曠野在在可通現今賊匪佔踞臨清其聯界最近州縣如清河威縣故城景州尤關緊要茲探聞賊

人於臨清城外西北運河搭成浮橋渡河搶劫附近臨清之西倉集王家淺各村莊仍即回住臨清是賊人不敢遠離巢穴臣思此時大兵未齊若遽一面拆橋捕勦賊必抵死抗拒設有疎虞恐擒捕轉難迅速是以臣仍令正定鎮總兵萬朝興駐劄清河縣之油坊一帶將所帶官兵密為劄營堵截併令臣標中軍副將瑪爾清阿帶領本標官兵一同駐守共兵一千二百名俟京兵齊集東省舒赫

德知會到日即由臨清西面同時併力合攻截殺  
自可一舉掃蕩即有四散餘匪竄入臣已於附近  
州縣地方添設兵役截擒即官兵亦不難追捕現  
在天津鎮永昌帶兵已到臣即令駐劄鄭家口一  
路臨時相機協應清河道單功擢令赴大名一帶  
會同大名協副將帶兵防截南路逸賊清河威縣  
一帶現有正定鎮萬朝興在彼防勦並令廣平府  
謝洪恩協同照料臣於最要之故城縣駐劄調度

既與山東緊接信息易通又可接應清河油坊並  
可北衛德州景州已知會舒赫德意見相同至東  
省來往之人恐有奸匪改裝匿跡臣已劄知道府  
并嚴飭州縣將弁密察查拏臣又於經過州縣時  
擇其中勇幹捕役帶有數十名於沿河往來踫探  
偵緝奏入報

聞

同日姚立德徐績奏言查賊踞舊城居民逃匿居



多其中當舖米鋪多被搶劫每日復向四鄉索取  
米麪豆草不應者即行殺害村莊亦即燒燬目前  
賊衆口糧似漸缺乏臣徐績同惟一伍什布率領  
滿漢兵丁二千名即從梁家淺往臨清南路進兵  
又恐其於運河西岸南竄復派撥叅將尚維寶都  
司洪哲燕協領伊承保都司彭文林等於臣徐績  
所帶兵二千名內撥給滿漢兵八百名由孔家集  
柳林等處邀截遇有賊匪即行截殺如遇大衆賊

匪逃竄即飛報臣徐績等以便進剿如無賊匪逃竄尚維寶等亦即直往臨清進發統約於九月二十四日進兵以期一舉掃平不留餘孽臣姚立德督兵防守東昌府城仍與臣徐績聲息相通緩急策應至東省有應行知會直隸河南之事臣等俱遵

旨隨時咨行劄致由驛馳遞不敢疎略奏入報聞

同日舒赫德拉旺多爾濟阿思哈奏言臣舒赫德等前定三路進攻之局即恐徐績等一路於調度彈壓之事未能妥協臨時稍有失挫於會勦全局大有關係臣等正擬奏派臣阿思哈前赴梁家淺一帶會同徐績帶兵進勦適奉到

諭旨仰見

聖明指示籌計周詳查徐績惟一處現有滿兵一千名漢兵一千五百餘名除劄商於清平高唐之間派

撥兵三四百名防備使賊匪不能東竄外現在尚  
餘兵二千餘名其數已不為少今臣等公同商酌  
即於現到京兵內選派三百名滄州駐防兵二百  
名天津綠營兵一百名臣阿思哈帶領於二十一  
日由高唐州前赴梁家淺至臨清一帶與徐績會  
合一處并派

乾清門侍衛伊琳隨往其應派之東三省健勇人二  
十名俟一到即令趕赴至臣舒赫德等現帶滿漢

兵除派去五百名外尚存一千七百名亦可敷用  
臣等現在探聽逆匪將車輛塞住街口似欲為固  
守之計是傳聞欲離臨清之說未確自應仍照前  
所定三路進攻始能盡殲賊衆臣等擬暫住恩縣  
夏津之間俟京兵陸續到來即行前進一面探聽  
賊匪消息如有移動之信仍即趙程追殺至賊人  
膽敢搶佔糧船於臨清北水關外搭蓋浮橋其意  
顯欲便於奔竄若能設法佔住將來進剿時既不

虞其北走而東岸亦便於勦捕前據周元理劄稱  
已調總兵萬朝興帶兵五百名就近往彼燒燬臣  
等進兵時仍留心察看地方形勢如可分兵或燒  
或拆務當盡心辦理奏入

上命軍機大臣傳諭舒赫德周元理姚立德徐績曰徐  
績等一路舒赫德已令阿思哈前往朕心甚慰至周  
元理一路止有綠營兵衆並無滿洲可恃之兵尚不  
放心著舒赫德酌量妥為照應其姚立德徐績所奏

據武生林苞稟稱王倫並非賊首尚有不知姓名一人同一和尚住鈔關衙門等語賊首如非王倫即應留心察訪係何姓名和尚又係何人務須悉其底裏賊營中尚有脫出之人無難詰詢而得但恐王倫自知罪大惡極捏造此語令人傳播且欲嫁禍他人著舒赫德姚立德徐績詳細確查具奏毋為奸計所惑臣等謹按首逆王倫自稔罪惡貫盈難逃顯戮因以並非賊首及別有朱兆龍為首之語捏詞

傳播以圖嫁禍他人我

皇上於飭查確訪時即察及於此

諭令毋為所惑迨後巨魁咸獲反覆研訊則首逆之行

謀奸狡一一供吐悉如

聖明料度益仰

睿照如神實無纖毫之得以遁飾也已

上又命軍機大臣傳諭舒赫德曰姚立德等所奏自賊  
營回出之林苞身係武生非齊民可比豈宜為賊脅





妥協臣即刻由景州起程馳赴督臣周元理駐劄之處稟請派撥勇幹將備弁兵數百名帶領前往臨清橋船西岸遇賊盡行殲戮不使一人漏網若相度機宜能將橋船拆斷亦必盡心妥辦再查浮橋處所尚屬臨清州地方若賊渡河向西與直隸清河故城兩縣交界僅數十里臣俟稟商督臣派撥將備官兵即刻相機前進實心辦理奏入報

聞

壬申

周元理奏言臣現奉

諭旨令楊景素帶兵前往臨清西岸殲賊拆橋臣查官  
兵俱在西岸屯駐即可令楊景素就近帶往臣已  
飛劄正定鎮萬朝興臣標副將瑪爾清阿率領將  
弁協力妥辦楊景素由景州前往必經故城臣當  
與之面商如勢能拆去浮橋即行儘力拆毀或度  
一時難拆仍在橋口協同鎮將堵截即日東省官

兵同時並舉直隸官兵即由西面撲剿亦可借浮橋為渡河協剿之用仍多派奮勇將升帶兵守橋截殺或應臨時拆斷以防賊人竄逸亦令相機辦理其天津鎮永昌仍令帶兵於鄭家口油坊一帶策應臣親自往來稽查彈壓不致稍有疎虞奏入報

聞

同日徐績奏言九月二十日丑刻接奉

上諭以臣調度不能合宜令阿思哈領兵由間道繞至南路會同辦理臣感激悚愧無以自安謹遵

旨候阿思哈等率兵與臣會合並聽舒赫德定期會辦臣惟有身先將弁奮不顧身隨同阿思哈勦殺以為綠營官兵倡率奏入報

聞

同日姚立德徐績奏言臣等奉到

恩旨將殺死逆賊之館陶縣武生王建基等賞給千總

職銜隨同殺賊之鄉民酌賞銀鏹並飭臣等出示曉諭臣等現在欽遵

諭旨辦理伏思賊營之外固當勸諭擒拏賊營之內尤當潛為解散臣徐績因臨清回民甚多現差回教把總王萬清外委王得官尋覓數人扮作賣柴賣菜令入賊營密為解散衆心令其各自逃出或於打仗時倒戈相向或於紛亂中棄仗奔逃並令王萬清等糾合洪家莊回衆數百人俟官兵與賊打

仗時回衆熟悉臨清舊城路徑直入巢穴擒其巨  
魁但能否妥辦有無效驗容俟回日另行奏報又  
奉

諭旨飭查惟一至東昌之事並格圖肯帶兵退回情形  
查惟一帶兵四百名格圖肯帶兵二百五十名十  
二日在臨清與賊攻戰多時旋被衝散是時賊勢  
頗盛臨清城門不便開放而兵丁又多失散昏暮  
難以招集是以惟一與格圖肯先後俱到東昌理

合據實覆奏

同日周元理奏言本月二十日戌刻據臣標中軍副將瑪爾清阿稟稱十九日四更時在油坊帶兵起身先差遊擊武靈阿剛塔帶領把總李鼎一員兵丁穆維等五名前赴山東境內之王家淺以上察探賊匪情形行至塔灣西南距臨清城三里時將天明遇有賊匪約百餘人從臨清之劉家莊放火搶劫而回內有一賊頭纏青布插花散髮身披



藍綢女褂手執腰刀該遊擊等即上前喊殺賊衆  
驚跑被把總李鼎兵丁穆維李文仁即將此賊砍  
倒拏獲訊問供名王三即行捆縛帶走約三里餘  
因其傷重隨經斬首又兵丁王春齊英劉伊鳳砍  
死不知姓名賊匪一名亦割取首級並將二犯所  
遺衣物銅鎖首飾錢文腰刀等項差弁稟送前來  
臣詳加驗看係男女衣褂等項確為賊匪搶掠民  
間之物該把總李鼎兵丁穆維李文仁王春齊英

劉伊鳳尚屬奮勇除將腰刀充公衣物錢文分賞  
出力兵丁外理合恭摺奏

聞奏入

上命軍機大臣傳諭舒赫德姚立德徐績周元理曰姚  
立德徐績奏稱現差回教把總王萬清外委王得官  
覓人潛入賊營密為解散衆心並令王萬清等糾合  
回衆俟打仗時直入巢穴擒其巨魁等語所辦未為  
妥協山東沿河一帶回子兇惡者多此時正當盡法

示懲若賊黨內本有回人轉令其因此邀功受賞何以使知儆懼著徐績將所差之把總外委撤回不必復行督辦至周元理所奏據中軍副將瑪爾清阿稟稱殺死賊匪二名雖所殺不多亦可見賊勢之漸形衰弱舒赫德即當奮揚我武盡掃妖氛以慰馳念

上又命軍機大臣傳諭舒赫德曰姚立德徐績覆奏惟一格圖肯退回東昌情形一事惟一格圖肯係領隊大員打仗時自當董勵士卒倍加鼓勇即或偶遇羣

賊衝散亦應約束衆兵勿令輕動若云彼時新城不  
便開門放進惟一格圖肯尤當奮不顧身與賊力戰  
設因衆寡不敵竟致臨陣捐軀國家自有優卹之典  
不惟榮加身後并且錄及子孫惟一等豈不知死於  
陣與死於法恩罪之相去較然乎且彼時若非惟一  
格圖肯立脚不定兵衆等何至四散紛逃此更無可  
置辯著舒赫德於臨辦時將此旨宣諭伊二人且俾  
衆共知之

癸酉

國泰奏言

臣查山東省應付官兵口糧等項事屬

創始臣正在細加諮詢詳請撫臣咨請部示旋奉

撫臣劄開接准部咨軍營每兵一名月支鹽菜銀

一兩五錢每兵二名帶跟役一名給銀五錢核之

臣前擬每兵一名連跟役月支銀一兩七錢五分

之數相符至草料一項臣前擬由地方官備辦聽

官兵自行買用今奉部文令沿途地方官豫備供

支在於本營馬乾銀內照數扣還臣已飛飭沿途  
州縣照依定例每馱馬一匹日支豆三京升十斤  
重草一束騎馬一匹日支豆三京升七斤重草一  
束一體供支事竣報部坐扣但部文專指京兵一  
項其外省駐防滿兵與各營綠旗兵應如何支給  
鹽菜口糧草料之處未奉示及查大學士舒赫德  
帶到保定駐防滿兵二百名滄州駐防滿兵二百  
名天津綠營兵八百名臣查駐防滿兵並無跟役

其鹽菜銀兩應照京兵減去銀二錢五分每兵一名月支鹽菜銀一兩五錢綠營兵向照滿兵減半支給每兵一名月支鹽菜銀七錢五分其駐防官員擬於京營官員所得鹽菜銀兩按照品級大小分別等差給與本員應得一月俸薪銀兩至綠營官員酌給各員應得半月薪水銀兩亦按品級大小分別等差惟口糧一項照依部開條例自大臣官員兵丁以至跟役每員名口支米八合三勺仍

照原奏統於各路官兵到德州之日起總給一月  
鹽菜口糧以省沿途按站支給之繁如回兵迅速  
或有溢支俟報銷時在於各官兵俸薪月餉內分  
別扣還已詳明大學士舒赫德檄飭各營將各官  
兵跟役數目造具印冊移交臣處核明應給銀米  
確數照依支給仍取印領存案以備將來報銷再  
查東省綠營並駐防係在本省調遣似與直隸調  
來者不同但兵丁日在軍營勢不能自備口糧鹽



菜草料帶往不得不由地方官供其汲爨芻秣臣  
再三酌量除滿漢各營官員原有薪水馬乾銀兩  
毋庸供支外其兵丁請暫照軍營之例每滿兵一  
名月給鹽菜銀一兩五錢綠營兵一名月給鹽菜  
銀七錢五分其口糧米各給八合三勺馬匹所須  
豆草令地方官一體供支除草料照例於本營馬  
乾內扣還外其口糧鹽菜銀米應否准給或亦於  
月餉內扣還併直隸駐防滿兵天津綠營兵應否

照臣酌擬之數辦理統俟部覆遵行奏入得

旨該部速議具奏

戶部尋議言東省奸民聚衆不法奉

旨選派健銳火器二營官兵一千名前往勦捕其滄州  
保定德州青州各駐防兵及天津鎮綠營兵亦係  
派往協捕賊衆與遠處出兵者不同本不應照軍  
需事例支應即如京兵一項起程時俱蒙

恩賞給銀兩京兵所至之處地方官止須照例備辦口

食聽其自買至各官兵騎馱馬匹俱係京城辦給  
前往自出差之日起例應停止在京馬乾其在外  
所需餵養草料令地方官先為豫備官兵到彼即  
將應支馬乾按日支給令其自行買餵至東省綠  
營兵丁各有應得名糧伊等仍在本省捕賊非調  
往別省出兵者可比不應如該布政使所請辦給  
其保定滄州青州德州駐防兵止應照各處駐防  
兵丁出差之例酌量借給即天津綠營兵亦可仿

照辦理均未便照軍需事例議給所有照料兵馬之事並交該地方官妥協經理應將該藩司所請酌定章程之處均毋庸議但此項鹽菜口糧業已支給兵丁未便於各兵名下追繳其辦理錯誤自在該撫徐績及該藩司國泰而臣部輒將西路用兵條例開單發給東省亦屬不合所有支給官兵銀糧等項應著落臣永貴王際華英廉金簡及徐績國泰各名下賠還並令該撫徐績將支給數目

若干作何分股著賠之處核明奏報以便按限賠補奏入得

旨依議

同日國泰奏言向來咨部事件例應由撫臣具咨藩司未便越職第今撫臣遠在軍營臣現在德州辦理應付京兵事宜若照例詳院請咨竊恐往返稽遲事關軍務錢糧少有錯誤即干罪戾是以臣即專摺奏請

訓示以便遵照辦理奏入

諭曰自當如此至辦理此等事不可拘泥不可畏難不可沾名爾等山東有如此悖逆撫藩均有大過若稍誤軍行首領不保何況家計慎之

同日周元理奏言臣於本月二十一日接奉

上諭飭於威縣平鄉一帶一併嚴密巡防臣查官兵現在屯劄臨清隔河西岸堵截賊匪西來之路即以捍衛清河威縣該二縣俱有弁兵在城守護自可

無慮且威縣與清河毗連去官兵屯劄之處聲援  
本自聯絡惟威縣所屬之邵固堡一村人烟稠密  
為威縣門戶去臨清止四十里臣已派清河道單  
功摧協同順德營遊擊高文亮多帶弁兵往來城  
堡防禦臣仍不時稽查彈壓至平鄉縣係在腹裏  
離臨清尚遠臣前將大局情形通盤籌算凡派出  
官兵俱酌撥於沿河緊要州縣切近地方分防截  
勦呼應亦速其餘稍遠州縣官兵不便分撥則飭

令地方官督率鄉勇民壯各役協同存城弁兵併力防範再東省邱縣界連威縣而館陶冠縣又與大名鄰近俱為東省西岸屏蔽現在豫省河北鎮帶兵一千名赴東協勦日內俱可抵東當令其相地堵防熟籌妥辦以副

聖懷奏入報

聞

同日楊景素奏言臣於九月二十一日辰刻至故



城西見督臣周元理知賊匪所搭船橋地名花園  
離臨清二里渡河而西尚屬臨清境內離直隸清  
河縣五十五里威縣九十里先經督臣派委正定  
鎮萬朝興及督標副將瑪爾清阿統領將弁帶兵  
一千二百名在於橋之西岸堵截要口臣即赴該  
處相度機宜實心堵殺不使一匪漏網奏入報

聞

同日舒赫德奏言臣接奉九月十九日

上諭給事中李淑芳奏壽張縣奸民聚衆滋擾大半皆  
無告饑民激成一摺代奸民飾詞誣罪而置順逆大  
義於不問所見實大不是等因臣查賊民倡亂敢於  
聚衆為奸甚至佔踞城池戕官劫庫無論若何起  
事總屬叛民逆黨為人心所共憤國法所不容況  
本年東省德州等處夏初雖覺雨少後即漸次霑  
足且亦與壽張等縣無涉今逆匪搶擄各鄉米豆  
糧食所在多有此其明驗即如臣現在統領官兵

從德州至恩縣一帶所遇村莊鄉民扶老攜幼氣  
象歡忻訪之夏津一路亦復相同壽張等縣境壤  
毗連何至獨被災荒竟致叛逆總由無識之徒遇  
有奸民滋事輒以為飢寒所迫又見河間等屬偶  
被偏災請賑道路貧民間有出口遂爾以風聞之  
語上瀆

宸聰今

皇上將李漱芳原摺封存俟事定後再行另辦揆之事

理實為至當臣現在惟有鼓勵各兵痛殲賊衆一  
俟拏獲逆渠即嚴行審訊將奸匪等如何起事之  
由查明據實陳

奏不敢稍有欺飾奏入報

聞

同日舒赫德拉旺多爾濟阿思哈奏言臣等前定  
路進攻時即慮及三面勦圍賊或從西路竄逸不  
可不防正在籌畫間適接徐績來劄稱臨清之西

南一二十里地名杏園及千戶營地方該匪屯聚  
尚有千餘人河西亦須分路進攻聞河南巡撫何  
煇現帶兵會勦已將賊衆聚集之處行知等因臣  
等當即行文何煇由館陶一路堵截杏園一帶逆  
匪今因何煇現在內黃正可帶兵由此一路迎勦  
臣現將二十四日進攻之期飛行何煇至直隸大  
名一帶據周元理來咨已派兵防截又恭奉

諭旨令周元理於威縣平鄉亦撥兵堵禦布置尤為緊

密又據徐績抄寄摺稿內稱派叅將尚維寶帶兵  
由孔家集柳林等處邀截賊匪等語查柳林即在  
杏園相近該處既有多兵繞截則西路亦可無虞  
理合遵

旨覆

奏

同日舒赫德拉旺多爾濟奏言查第二起京兵於  
二十日到來第三起亦於二十一日齊集臣等定

於二十二日即統兵由思縣起程至夏津縣計程  
七十里一日可到自夏津至臨清計程六十里若  
於二十三日一站趕到即行接仗恐隊內步兵未  
免疲乏賊人轉得以逸待勞臣等擬於離臨清二  
三十里先審擇地面屯劄營盤稍休兵力一面遣  
輕騎前往捉生偵探至二十四日黎明即拔營挨  
隊進發乘各兵養銳之後敢勇直前使賊匪猝難  
抵禦今早阿思哈起程時臣等已將二十四日進

攻之期面為說定並即密劄徐績周元理一體遵照同時並進以收夾擊之益伏思逆匪等受

國家百餘年昇平之福膽敢肆其叛逆殺官害民罪大惡極莫此為甚臣等務期鼓勵士卒奮勇擒渠不留餘孽以慰

聖懷奏入

上命軍機大臣傳諭舒赫德曰舒赫德等奏官兵定期會剿一摺自應如此辦理至杏園一帶之賊現行文



何燭從館陶一路堵截威縣平鄉周元理亦撥兵堵  
禦其孔家集柳林等處又有邀截之兵如此四面布  
置賊人斷無能潛竄自可早縛兇渠各殲逆黨現在  
南河漫口據吳嗣爵薩載奏報月內已可合龍舒赫  
德將東省勦捕賊匪之事辦竣亦可無庸復往并令  
傳諭知之

同日周元理奏言本月二十二日寅刻據中軍副  
將瑪爾清阿差外委周永肅兵丁張傑報稱督鎮

二標官兵在臨清西岸屯劄二十一日未刻有賊約三千餘人內騎馬者二三十人餘悉步行各執腰刀鋤棍由上下兩路來至我兵營盤擾劫我兵用鎗礮轟打賊即分散內有騎馬賊目手執紅旗招動賊衆復合我兵連用火礮轟擊合而復散者數次賊衆被鎗礮打死者無數並鎗斃馬上賊目一人賊復上前抵拒我兵又砍斃多人生擒活口三人督鎮兩標官兵千餘齊心協力愈殺愈勇賊

勢漸退現在相持等語查賊衆在於臨清西南村莊每日放火劫搶與直隸緊接茲復膽敢來至我兵營盤滋擾抵拒情甚可惡經我兵奮勇擊殺賊衆尚未即退臣現今天津鎮永昌前往策應臣一面星飛知會舒赫德即速統兵前來協同勦殺並可乘勢多派將兵搗其舊城巢穴使之不能兼顧以期速就殲除奏入

上命軍機大臣傳諭舒赫德周元理曰周元理奏官兵

在臨清西岸殲擊賊衆之事所有在事出力之兵弁甚屬可嘉自當查明優賞其奮勇董率之副將瑪爾清阿等均著存記冊檔俟事竣交部議叙至橋西之兵原防賊匪過河竄逸是以前諭令其度勢相機將橋拆斷今賊衆既已渡河則所爭又不在橋此時惟當力堵河岸勿令他竄再周元理所報三千餘賊未必果有如許之多或係聞八旗勁旅前往聲勢甚威不敢接鋒為此悲衆而來作鉞而走險之計以冀喙

脫偷生若果如此則此時舊城內賊衆必少或賊頭  
捨命先行突出仍留餘賊在舊城接應或其逆黨均  
來擾劫營盤止留眷屬輜重在彼均無難偵訪而得  
舒赫德到臨清時即探明賊中實在情形若賊已全  
行過橋即統滿洲兵迅往追勦仍派妥幹將領帶兵  
往舊城搜其巢穴擒其眷口將賊黨盡行殲戮若舊  
城尚有為首賊衆則往勦之兵又當稍多著舒赫德  
斟酌妥辦總期迅速就擒勿使一人漏網

上又命軍機大臣傳諭舒赫德曰賊匪聚集臨清滋擾日久始行搶船搭橋若惟一格圖肯早於城外防截賊人焉敢至臨清北搶用糧船此亦惟一格圖肯之罪著舒赫德一併訊明辦理再賊人搶奪空糧船該衛官不能無罪已諭令嘉謨查明叅奏其實在情形并著舒赫德查奏

欽定勦捕臨清逆匪紀略卷五

欽定四庫全書

欽定勦捕臨清逆匪紀略卷六

甲戌

徐績奏言臣於二十日移營梁土閘地方距臨清五十餘里候阿思哈兵到會齊進發是日戌刻接臨清州知州秦震鈞副將葉信稟稱十七十八兩日賊人並未攻城十九日三更時有賊衆用大車三輛裝載秫秸板片木料蜂擁而來欲燒攻南門

官兵於城上施放鎗礮擲擊磚石傷斃約有數十人車輛不能近城又射放火箭將車燒燬二輛至四更時賊衆退去尚有車一輛因其隣近城門未便放箭隨挑兵丁十數名領州役民夫將車載柴木搬置車下藏有賊匪七名均被殺死城得保全等情臣飛飭文武各官堅心固守臣探知賊匪將臨清舊城及附近鄉村人民俱逼令入夥助勢目下舊城聚集人數約計三千有餘多係一時勉強



脅從仍各潛圖逃脫所有臣前此差往之回教把總王萬青等現已回營至臣前奉

諭旨飭查賊人鎗礮火藥從何而來臣查壽張營遊擊趕福拒賊捐軀其鎗礮火藥必不能顧即官兵屢次交戰兵丁不無傷損烏鎗亦有遺失但臣親見賊匪打仗止憑刀槍不用鎗礮或賊匪雖得鎗礮而不能用臣已行查壽張楊穀堂邑等縣失去鎗礮火藥確數另行嚴叅治罪再臣於二十一日據

探兵張廷棟協同武舉張廷英在臨清州運河西岸石長屯地方同鄉民拏獲逆匪劉存禮趙添富二名搜出衣服銀兩臣親率道府詳訊賊中情形謹錄供呈

覽至此等逆匪刻不可留臣已將該犯等在營門外立時亂刀砍死其衣服銀兩分給獲賊人等以示獎賞奏入報

聞

同日舒赫德拉旺多爾濟奏言本月二十二日辰刻臣等正自恩縣起程適接周元理劄知逆匪竟敢先犯河西營盤臣等一聞此信即於未刻統兵迅抵夏津一面派侍衛音濟圖先帶京兵三百名飛往臨清柳林一帶使賊人知大兵已到勢必將西岸之賊撤回抵禦臣等略休馬力星夜繼進倘賊人尚在河西肆擾其舊城巢穴空虛正可乘機襲殺再臣等於接到周元理劄後早經飛劄徐績

囑其挑選精兵數百先為接應其大隊亦即續進計阿思哈之兵明日亦可到臨清至春寧已於本日帶領東三省健力人趕至夏津所有應行派往阿思哈處二十人若由高唐繞道前去反稽時刻臣等亦一併帶往於到臨清後再行酌撥奏入報聞

同日阿思哈徐績奏言竊臣阿思哈於二十二日申刻到梁土閘地方與臣徐績會合正在商議進

欽定勦捕賊清逆方略

金史卷一百一十五  
銳兵二百名亦即帶領起行趕赴臨清相機辦理  
奏入報

聞

臣等謹按三路進攻其徐績一路兵數雖多未  
諳調度即於全局攸關我

皇上先期指示選派滿洲勁旅並直隸駐防綠營兵令  
臣阿思哈帶領并派

乾清門侍衛伊琳及東三省健勇人等前赴臨清與

徐績會合聲勢壯盛即徐績所帶滿漢各兵亦  
得觀感奮發自此三路並進賊衆膽落不難聚  
殲實皆

聖謨之豫握勝算也

同日周元理奏言二十二日戌刻據萬朝興瑪爾  
清阿差弁稟報昨日接仗時我兵施放鎗礮轟斃  
賊衆甚多內有騎馬賊目腰插紅旗手執白蠟桿  
槍直奔我營經遊擊武靈阿一箭射中左肩賊拔

箭復衝經兵丁穆維放鎗打中右腿墜馬穆維即  
上前砍其首級賊馬奔跑我兵攔住馬鬃上繫有  
紅綢標寫楊壘字樣詢之所獲賊口稱係賊號總  
兵偽官又打死騎驃執劔一賊騎馬手執紅旗一  
賊俱不知姓名將至酉刻賊人尚堅力抵拒副將  
瑪爾清阿等直前衝殺賊衆始行退走經瑪爾清  
阿率衆上前砍死十餘人衆皆由堤岸奔回賊巢  
時天已向晚官兵回營防守竟夜並無聲息此次



接仗時除鎗礮轟斃賊人外陣前獲賊八名旋俱  
傷重身死又沿途拏獲三名並獲馬一匹及槍刀  
鐵叉鋤耨等件解弁兵押護解送前來臣查此等  
賊匪亡命遊魂而我兵接仗之時皆奮不顧身爭  
先出力又無一人傷損至賊見我兵鎗礮利害有  
棄械逃跑者有紛紛潰散者大概係愚民被脅者  
多其心不齊大兵會集自不難一舉掃平奏入

上諭內閣曰直隸官兵此次堵殺賊匪使其不能西逸

將領弁兵俱奮勇出力甚為可嘉瑪爾清阿著遇有  
總兵缺出提奏陞用武靈阿著交部遇有叅將缺出  
即行陞補兵丁穆維著交該督遇有千總缺出即行  
拔補其在事出力兵丁著周元理查明酌量獎賞以  
示鼓勵該督周元理調度督率有方並著交部議叙  
上命軍機大臣傳諭舒赫德拉旺多爾濟阿思哈徐績  
周元理楊景素曰此次直隸官兵奮勇出力甚屬可  
嘉可見綠營兵非盡無用惟在帶兵將領董率有方

未嘗不可得力已有旨加恩擢叙獎賞看來賊匪悉  
衆突橋而過必因聞八旗勁旅聲勢甚盛自揣力不  
能支思欲豫為竄逸料河西綠營兵未必精銳希圖  
由彼衝過可往他處搶劫今遇瑪爾清阿等奮勇痛  
殲賊衆并殪其賊目三人餘皆亡魂喪膽奔回臨清  
舊城其勢益復窮蹙其技更無可施今舒赫德等合  
兵分路夾攻賊自不能走脫舒赫德務將所有真賊  
盡數殲擒毋使一人漏網並當從重辦理勿稍姑息

至萬朝興瑪爾清阿所統直隸兵一千二百名雖在河西堵截橋路原係派令從臨清西北會勦今賊既奔回舊城其橋已屬無用直隸官兵均當過橋聽舒赫德調度所有河上船橋自應立時拆盡以斷賊人去路其空存糧船均應移泊遠處並令嘉謨派弁兵看守以防賊人偷渡楊景素現到臨清即應在河之東岸屯駐周元理亦應帶兵至西岸與楊景素隔河相望為犄角之勢又閱徐績所訊獲賊劉存禮趙添

富供詞有賊中大頭目王姓孟姓歸姓諸人俱當迅  
速查明擒拏家屬重究又穆維所殺賊目有楊壘字  
樣係賊人偽總兵之稱是賊人必有僭稱偽號及種  
種不軌情事均著逐一嚴訊明確據實具奏

臣等謹按賊匪久聚臨清一聞京兵南下輒敢  
搶佔糧船搭蓋浮橋計圖竄匿若堵禦稍遲一  
有走逸則搜捕又稽時日我

皇上神機先覺豫

勅周元理等督兵扼住橋口奮力堵殺賊匪不能西逸  
奔回舊巢勢窮力蹙而我兵乘勝會勦一掃餘  
氛領兵大臣督撫等稟承

指授迅奏成功小醜殄滅之速未有若此者也

上又命軍機大臣傳諭舒赫德曰徐績如能奮勇勦賊  
尚可功過相抵若惟一格圖肯二人臨陣退縮雖親  
身擒獲賊首亦不能抵其罪即如賊匪此次過橋奔  
往西岸擾劫官兵營盤經瑪爾清阿等力戰抵擊殲

其賊目三人賊始奔逃仍回舊城賊巢瑪爾清阿所帶獨非綠營兵衆乎且為數不過一千二百名並不甚多使惟一格圖肯亦能如瑪爾清阿之率衆禦賊所統官兵何至有潰散之事以此相較則惟一格圖肯之罪更無可解著舒赫德於惟一格圖肯正法時將此一節亦行訊取確供具奏

同日軍機大臣奏言臣等遵

旨詢問自山東賊營逃出來京之杜安邦并傳給事中

李淑芳看詢據杜安邦稱我係壽張縣人因報捐  
兵馬司吏目回家起赴選文結於五月內到家八  
月二十八夜間賊人猝然進城沿門搶殺我向其  
抵禦背上被賊砍了一刀將我捆住拴在牛車上  
拉至臨清我就乘空逃出至壽張縣四五月間雨  
雖略遲後即屢得透雨實有六七分收成各村莊  
多有糧食堆積米麪價值並不昂貴本地並未聞  
有饑民乏食之事亦並無具呈報災之人此次聚



衆滋擾實係邪教奸民並非饑民衆所共知不敢  
謊說其壽張縣官係讀書誠實之人百姓多說他  
好並無諱災之事至賊人如何啟釁及邪教如何  
傳播我實在不得知道等語奏入報

聞

同日何燭奏言臣於九月二十日接山東撫臣劉  
知九月二十四日有進勦之信臣即飭令河北鎮  
總兵黃模前赴東省會兵協勦查該鎮現已帶兵

八百餘名臣又於所帶駐防並本標官兵內派撥三百名令該鎮會同城守尉七十九於二十一日自內黃帶領前進並將協勦機要事宜面為詳晰指示臣查豫省北境與直隸大名聯界大名與東省聯界雖距臨清二百八十里而內黃縣一帶為由東赴豫緊要邊界其地濱臨衛河船戶水手皆係無藉之徒易於藏匿且豫省河北地方向來亦有邪教曾經嚴加懲創近年頗知改悔並無不逞

之徒惟是東省賊匪如鬼如蜮地界毗連保無潛  
相煽惑不可不多方查察臣現在內黃一帶嚴督  
弁兵實力防勦一以擒捕南竄之賊匪一以杜絕  
勾引之奸徒仍嚴飭地方文武各官留心稽查凡  
通衢集鎮孤僻村莊漳河衛河渡口遇有由東來  
豫者無論過客行商但有面生可疑來歷不明之  
徒嚴密盤查不使逆賊輾轉勾連乘機滋事奏入

報

聞

同日周元理又奏言二十三日已刻據中軍副將  
瑪爾清阿差把總孫魁報稱藩司楊景素到營與  
該副將會商拆橋事宜瑪爾清阿即於二十三日  
五鼓後率領督標遊擊都司備弁帶兵六百名直  
趨橋船處所將及天明橋東以及船上約有賊數  
百人堵禦用礮向我兵轟打官兵即在隄後避過  
隨用大礮向賊轟擊打死賊衆多人賊復合聚用

礮向我兵連打但聞響聲並無鉛彈我兵又連用鎗礮轟打賊衆退回該處浮橋中用大船兩頭俱用小船我兵搬取秫秸放火焚燬其時兵丁穆維同兵四五人乘間搶過浮橋東岸奪取賊人礮位二座搶回西岸橋船盡已燒燬此路已斷是夜聞臨清東面鎗聲不絕自必舒赫德帶兵已到探得確信我兵即可會勦掃除賊巢奏入

上諭內閣曰穆維用鎗擊斃賊目已加恩准以千總即

補今復搶礮焚橋奮勇超衆其屬可嘉穆維著賞給  
奮勇巴圖魯號照例賞銀一百兩仍著賞帶藍翎以  
示獎勵其隨往之兵丁四五人並著周元理查明遇  
有把總缺即行拔補

臣等謹按賊匪佔踞舊城聞官兵四面合殲聲  
威神速因思渡河西逸冀夥衆得以捨死奔突  
首逆即可接跡竄逸我

皇上洞燭奸謀令周元理派勇幹將領扼要嚴防楊景

素燒燬橋船斷其去路賊衆膽落魄伏穴待  
斃臣舒赫德等得以稟承

睿略迅速勦除至於錄功優擢

褒獎屢加而兵丁穆維以奮勇出衆超拔千總給號賞

翎逾格

殊恩尤足以使人懷自勵矣

乙亥

上諭內閣曰壽張縣候選吏目杜安邦因回籍起文赴

金史卷一百一十五  
選正遇賊匪滋擾被賊砍傷捆縛乘間脫出赴京首  
告賊匪情形情尚可憫著加恩以吏目即用

上命軍機大臣傳諭舒赫德曰今日復詢據杜安邦稱  
逆賊沿途搶劫村莊擄掠婦女及用牛車圍繞賊人  
居住其中等情節與該撫等節次奏到之摺大略相  
同又稱賊在杏園莊與官兵打仗時賊首仍係王倫  
其所言面貌亦與徐績訪聞無異至徐績昨奏賊首  
朱兆龍之語杜安邦在賊營時未聞此說是必係王



倫自揣罪大惡極為神人所共憤故爾嫁禍他人託  
言明季之後藉名煽誘愚民舒赫德等須嚴切查訊  
勿使遁飾又稱賊上村內平房拒敵時并有女賊數  
人在彼紅綢纏腰有一老年者在前執刀喊叫又有  
一和尚手執紅旗騎馬來往隨意指揮衆皆稱為梵  
元帥此外又有稱孟元帥者等語此輩俱係何人自  
係賊黨中之尤點惡者捕獲賊犯時必當嚴訊速辦  
務須徹底根究勿使漏網至牛車所載婦女據云係

擄掠者多舒赫德等應將此等婦女查係逆犯眷屬  
即行分別從重辦理其實係被擄者交地方官查其  
居址釋放還家

上又命軍機大臣密諭舒赫德曰壽張奸民以邪教煽  
惑聚衆滋擾一案徐績身為巡撫平日漫無稽查事  
後又無措置本有應得之罪但奸民罪大惡極若因  
此即罷退巡撫恐更長奸民之智或徐績於東省不  
甚相宜又不便過於遷就著舒赫德訪察徐績在官

優劣若何該省百姓是否愛戴即道路之言亦必有公論可採即行核實密奏

同日楊景素萬朝興奏言臣楊景素令副將瑪爾清阿帶兵燬拆臨清船橋後即在西岸堵截逸匪因思臨清有三岔河尚易西渡該處洪觀營回民屢與賊匪抗敵素稱強壯臣等即於本日派忠順營都司張世富帶領能事回兵白虎酌撥馬兵一同前往堵截并令白虎以大義曉諭回民內洪印

洪金等皆願出力當集二百餘衆與該都司張世富率兵堵殺茲該都司稟稱二十三日同奉派帶領白虎等一百名赴三岔河口堵殺賊匪行至河口見對岸賊約有千人河內有大船三隻小船一隻都司即對岸施放鳥鎗弓箭賊乘小船俱渡上大船對敵都司隨施放大礮將船打破其被弓箭鳥鎗傷死者二百餘人沉水淹死者約三四百人逃回者約數百人將大船三隻俱各燒燬船內燒

死者約百人拏獲活口二十七人殺獲首級九個  
合行飛報等情臣謹馳摺具

奏奏入

上諭內閣曰都司張世富帶領回兵白虎曉諭回民洪  
印洪金等勦擊燒燬賊船殺賊多人甚屬可嘉張世  
富著於事平後交部議叙回兵白虎著交該督周元  
理以把總拔補其在事出力之弁兵及回民洪印洪  
金等并著楊景素就近查明酌量獎賞以示鼓勵

臣等謹按此次殲滅賊匪實由滿洲勁旅倡率各路官兵鼓勇無前故得成功迅捷原無藉回民之欣助況回民習尚兇悍若欲專用其力益致驕縱難馴或隨營著有微勞原可獎同一視是以前次徐績請令把總內之回人王萬青率回衆入賊巢誘勦即奉

諭旨撤回而徐績已遣其行迄無所效至此次都司張世富帶領回兵白虎等殺賊燬船楊景素奏至

即邀分別賞拔仰見我

皇上時措咸宜實準酌乎情理之至當耳

同日何燭奏言九月二十二日臣調到陳州營兵二百名汝寧營兵六十名襄城營兵三百名共五百六十名即刻派令汝寧營叅將福昌阿於二十三日帶領前赴館陶一帶接應總兵黃模之兵並面囑其相機前進若賊人仍踞舊城則四面攻擊合力勦捕倘賊人移動他往即會同大兵尾隨追

殺臣又劄令黃模等並嚴飭各處防截弁兵如遇  
有解辦挽結者即係真賊必期盡力掩捕擒拿勿  
使一賊免脫至二十四日各路進兵會勦之信前  
准山東撫臣徐績劄知臣即諄囑鎮臣黃模領兵  
馳赴臨清西南館陶一帶并力勦殺尅期殲滅醜  
類計程二十二日可到館陶無誤會勦之期奏入  
報

聞



同日國泰奏言前經大學士舒赫德奏請截留福建山東新買馬匹在德州餵養應用欽奉

諭旨允行日內健銳火器兩營及索倫兵丁陸續更換騎赴臨清共用馬三百九十八匹其餘馬匹臣於二十二日接奉大學士舒赫德劄諭著將截留馬匹解赴附近軍營之恩縣夏津聽候撥調臣遵照來劄隨即遴委幹員多帶夫役押送恩縣夏津二處交給地方官加意喂養仍聽大學士舒赫德就

近撥用再臣於本月二十一日訪聞德州州民張  
佃形跡可疑即日派令守備孟大勇幫同該州知  
州李燕帶領兵役密往擒拏張佃並家屬鄰佑人  
等訊出平日習拳誦呪傳自平原人許文明各供  
顯係奉行邪教之犯現仍飭令嚴拏許文明到案  
訊得確情另行奏報

同日國泰又奏言本月二十一日二更時護軍統  
領春寧帶領索倫兵馳到德州當經照例換給馬

匹支給鹽菜口糧卽於二十二日五鼓起程前赴  
恩縣再兵部員外郎瑪爾札等押解箭二萬枝工  
部主事圖桑阿等押解火藥鉛彈共一萬一千五  
百斤亦於二十二日同抵德州當卽酌給車輛馬  
匹撥兵護送卽於本日起程計期二十三日即可  
解到軍營應用無誤至官兵騎用馬匹所需料豆  
草束最關緊要日內大兵雲集尅期攻勦恐賊匪  
四散奔竄官兵從後尾追所到地方難以懸定似

應於相近軍營各處豫為設法存貯以為緩急不時之需臣前經飭令平原禹城等十五州縣買備料豆草束原以協濟德州一帶供支今京兵俱有贏無缺足數官兵回程之用因飭令各該州縣迅速運至相近臨清軍營之高唐夏津兩處存貯備用並令各備大車數輛以便隨時裝運其餘隣近東昌州縣即令解赴東昌府城收貯庶幾有備無虞可以源源接濟奏入

上命軍機大臣傳諭國泰曰國泰所奏訪獲之張佃一  
犯平日習拳誦呪必非善類其傳伊拳呪之平原人  
許文明自係邪教一黨國泰必須將該犯速拏到案  
嚴訊確情具奏至另摺所奏備辦草料一節雖係應  
辦之事未免過涉張皇此次所辦不過勦捕賊匪並  
非出兵不應照軍需辦理並將此飭諭知之

同日高晉奏言山東壽張賊匪聚眾滋擾現在勦  
捕臣欽遵

諭旨即自老壩口漫工起程馳赴徐屬沿途經過之宿  
遷邳州一帶皆係接壤山東地方即順道查勘將  
各州縣城內並水陸要隘處所添派官兵協同防  
守臣到徐後並將銅山以及豐沛蕭碭等縣毗連  
山東之嶧縣單縣金鄉魚臺一帶地方亦即添派  
員弁帶兵分防並出示曉諭百姓使知集兵原以  
衛民士民咸知感頌

皇仁各安生業不致驚惶其自江南由東大路泰安一

帶往北者照常安靜行旅往來並無阻隔至臣原  
調漕河各標兵一千二百名并於壽春鎮標調兵  
五百名狼山鎮標調兵三百名今河標中營及漕  
標之兵二百五十名現已到徐其壽春鎮標兵兩  
三日內亦可陸續前來惟狼山鎮相隔稍遠未經  
復調臣於本標調選精健兵二百四十名來徐核  
計所調各兵除分派各處防守外現在徐州存兵  
尚有一千餘名并於督提漕河各標將備內擇其

驍勇諳練軍旅者飛調數員來徐委用復調廬鳳  
道棟文淮徐道巴靈阿隨營辦事各要隘俱安設  
臺站驛遞公文復差妥幹員弁前往山東撫臣徐  
績河臣姚立德處探聽賊匪情形以便上下策應  
聲息相通庶可隨時邀截擒拏伏思賊匪本係烏  
合之衆今聞東省官兵已將賊衆圍住臨清復蒙  
皇上揀派京兵及駐防滿兵

特命大學士舒赫德等帶領前往會勦不難尅期殲滅



倘有餘黨逃竄來南及隣近探有賊匪蹤跡臣即帶領官兵前往追擒務期殲捕淨盡不使稍留餘孽貽害地方奏入

上命軍機大臣傳諭高晉曰高晉所調之兵數至二千餘名未免過多著高晉酌留得用之兵千數餘俱減撤令回本營勿使多羈時日至該督既往山東境上防截賊匪竄逸自應至豐沛一帶交界處所督兵調度不應專在徐州府城將此諭令知之

欽定勦捕臨清逆匪紀畧卷六